



Mariane Pavi­asen Jensen
inatsisartut@ina.alla.gl
Inatsisartunut ilaasorta­q

Ukiuunerani Qassiarsummi ilaasunik angallassisarneq pillugu § 37 naapertorlugu apeqquteqaammut 2025-220-mut akissut

Dato: 26-01-2026
Sagsnr.: 2025 - 26633
ID. nr.: 79627298

Asasara Mariane Pavi­asen Jensen

Inatsisartut suleriaasianni § 37 naapertorlugu ukiuunerani Qassiarsummi ilaasunik angallassisarneq pillugu Naalakkersuisunut apeqquteqaateqarputit. Apeqqutitit uannit akineqartussatut innersuunneqarput. Apeqqutitit matuma kinguliani ataasiakkaarlugit allanneqarput, akissummillu malitseqarlutik.

Postboks 909
3900 Nuuk
Tlf.: (+299) 34 50 00
E-mail: box909@nanoq.gl
www.naalakkersuisut.gl

Apeqqut 1: Naalakkersuisut Nunaqarfimmi Qassiar­suup ukiuk­kut sikutillugu angallannikkut tiki­nneqarsinnaajunnaartarnera qanoq iliuuseqarfigissallugu pilersaaruteqarpat?

Akissut: Ineqarnermut, Attaveqaasersuutitut Isorliu­nerusunullu Naalakkersuisoqarfik maannakkut Qassiarsummi ukiuunerani imaatigut angallassinermik timmisartuussinermilluunniit allannguinnissamut iliuusissanik aallartitsisimanngilaq.

Ineqarnermut, Attaveqaasersuutitut Isorliu­nerusunullu Naalakkersuisoqarfiup apeqqutit akissuteqarfiginnissaanut Disko Line oqaaseqartippaa. Disko Line imatut paasissutissiivoq:

"Kangerluk sikugaangat, aammalu Disko Line-miit imaatigut angalasinnaajunnaaraangatta, nalinginnaasumik Sermeq Helicopters (SH) imaluunniit Air Greenland (AG) angallavimmi tassani timmisartuussinissamut attartortarparut. Kisiannili kingulliulluni taaneqartoq, AG, ilaasoqarluni timmisartornissamut akuersisummik immikkut ittumik qinnuteqartariaqartarpoq, Qassiar­­suk qulimiguullip mittarfianik akuerisamik soqanngimmat. Pineqartunili marluusuni Pilersuisoq suleqatigalugu mittarfiup aputaajarneqarsimanissaa, eqqakkanik soqannginnissaa minnissamullu allanik ajoquteqannginnissaa tamatigut qulakkeerneqartartussaavoq. Tamatumanili unammilligassaasarpooq, SH aamma AG amerlanertigut naammattunik suliaqareertarmata, taamaattumillu pilersaarutaannut, piffissanut qasuersaarfissanut aalajangersagaannut taarneratalu killiliisarnernut naleqqussartariaqartaratta. Taamaattumik amerlanertigut ullormi atuuttumi attartorsinnaasanngilagut, ilaatigullu aamma ullualunni utaqqisariaqartarluta. Disko Line-miit tamatigut ilaasutta sapinngisamik sukkasuumik isumannaannerpaamillu ornitaminnut apuunnissaat sulissutigisarpaput."

Apeqquut 1a: Taamaappat iliuuseriniakkat suut sulissutigineqarpat?

Akissut: Apeqquut 2a-mut akissut innersuussutigineqarpoq.

Apeqquut 1b: Taamaangippat sooq iliuuseqarusuttoqanngila?

Akissut: Kommune Kujallermiit naalakkersuisoqarfinnut ilisimatitsisoqarpoq, sikugaangat namminersortut biilnik, qamuterallannik, ATV-nik il.il. sikukkut annertuumik assartuussisartut. Taamaattumik amerlanertigut Qassiarsuppiani innuttaasut namminneerlutik Narsarsuarmut angalasinnaapput, maannarpiq tassannaanniit timmisartumik qulimiguulimilluunniit ingerlaqqinnissaq periarfissaammat.

Tamatuma saniatigut apeqquut 2a-mut akissut innersuussutigineqarpoq.

Apeqquut 2: Nunatsinni illoqarfiit nunaqarfiillu sorliit ukiukkut sikunerani angallannikkut angallannikkut tikiqqarsaartarpat?

Akissut: Ineqarnermut, Attaveqaasersuutitut Isorliunerusunullu Naalakkersuisoqarfiup apeqquut akissuteqarfiginissaanut Dansk Meteorologisk Institut (DMI) oqaaseqartippaa. DMI imatut paasissutissiivoq:

"Ukiuunerata atoruminaattarnera sivilisatarnalu Kalaallit Nunaanni allanngorartorujussuusoqarpoq, tassalu nunami sumiinneq ukiumiillu ukiumut apeqquutaasarluni, tamannalu immap sikusarneranut, sikuq ingerlaartarneranut peertarneranullu isumaqarpoq. Ukiuunerata qaammataani (novembari – decembarimiit aprili – maajimut) Kalaallit Nunaata kangiani avannaanilu illoqarfiit nunaqarfiillu amerlanersaat immap sikua peqqutigalugu imaatigut angallavigineqarsinnaasanngillat.

Kisiannili Kalaallit Nunaata kitaata kujataani illoqarfiit nunaqarfiillu amerlanersaasa immap sikuaniit sunnerneqartarnerat annikinneruvoq sivilikinnerullunilu. Tamanna aamma allanngorartorujussuarsinnaasoqarpoq. Assersuutigalugu 2022-mi februaari – marsimi Kalaallit Nunaata kitaata annersaa immap sikuunera peqqutigalugu immakkut angallavigineqarsinnaasimanngilaq. Ukiut ilaanni sineriammi immap sikua ammanerusarpoq, taamaattumillu ukiuunerani ilulissat kujataanni illoqarfiit nunaqarfiillu imaatigut angallavigineqarnissaannut periarfissat pitsaanerusarput.

Siunissami immap kissakkiartornerani immap sikusarnera ataatsimut isigalugu annikinnerulertussaavoq. Piffissaq imaatigut apuuffiusinnaasoq sivilisulertussaavoq. Sulili nunami sumiinneq apeqquutaalluni ukiumiit ukiumut annertuumik assigiinngissuteqartoqartassaaq."

Aamma Ineqarnermut, Attaveqaasersuutitut Isorliunerusunullu Naalakkersuisoqarfiup apeqquut akissuteqarfiginissaanut Disko Line oqaaseqarteqqippaa. Disko Line illoqarfiit nunaqarfiillu, immap sikunera pissutigalugu tikiqqarsinnaajunnaartartussat pillugit imatut paasissutissiivoq:

"Tungitsinniit kujataani Qassiarsuk, Itilleq, Igaliku, Narsarsuaq, Qeqqani Maniitsoq nunaqarfiillu, kiisalu Sisimiut nunaqarfiillu ukiuunerani, aamma

*Aasiaat eqqaanni nunaqarfiit upernaap qaangiutillernerani
[tikinneqarsinnaajunnaartarput]."*

Apeqquut 2a: Taakkununga tunngatillugu Naalakkersuisut iliuuseqarniarpat?

Akissut: Ukiuunerani Disko Line qaammatit ilaanni sikorsuaqarnera immalluunniit sikusimanera peqqutaallutik nunaqarfinnut tikissinnaajunnaaraangat, amerlanertigut angallassinermi Air Greenlandip qulimiguuliutaa atorlugu timmisartuussisoqartassaaq. Tassani ilaatigut Itilleq, Sarfannguit Narsarsuarlu pineqarput. Nunaqarfiit qulimiguulinnut mittarfeqanngitsut, assersuutigalugu Qassiarsuk, pisariaqartillugu timmisartuussiffiqeqarsinnaapput.

Nunaqarfinnut qulimiguulinnut mittarfeqanngitsunut pisariaqartillugu angallassisarnermut atugassarititaasut pitsaanerulersinniarlugit Ineqarnermut, Attaveqaasersuutinut Isorliunerusunullu Naalakkersuisoqarfiup Angallannermut Aqutsisoqarfik oqaloqatigaa. Angallannermut Aqutsisoqarfiup oqaloqatigineqarnera matuma siuliani taaneqartunik pisoqartillugu pisariaqartitsisoqarnerani qulimiguulimmik angallassisarnermut inatsisitigut sinaakutissanik pilersitsinissamut tunngasuuvuq.

Sumiiffinni piffissap ilaani immap sikuunera sikorsuaqarneraluunniit peqqutigalugu tikinneqarsinnaanngitsuni sikumik aserorterisarnermi suliniutit annertusitinneqangaatsiarnissaat naapertuuttutut isumaqarfigineqanngillat.

Ukiuunerani sikumik aserorterisoqareernerani imaq sukkasuumik sikoqqissinnaavoq.

Tamatuma saniatigut pissutsit allat arlallit naliliinermut ilanngunneqassapput. Sikumik aserorterinissaq suliamiit suliamut naliliiffiqeqartartussaavoq, pisariaqartitat periarfissallu allanngorarsinnaammata. Tamanna tunngavigalugu kommunit sikusiummik kissaateqarnerminnik Naalakkersuisunut saqqummiussipput, najukkat ilisimagamikkitt, aammalu najukkani inuiaqatigiinnut naatsorsuutiginnngisamik kinguneqartoqarsinnaanera naliliiffiqeqarsinnaagamikkitt.

Apeqquut 2b: Taamaappat suut iliuuseriniarpaat aamma iliuuseriniakkat qaqugu piviusunngortinniarneqarpat?

Akissut: Apeqquut 2a-mut akissut innersuussutigineqarpoq.

Apeqquut 2c: Taamaanngippat sooq iliuuseqarusuttoqanngila?

Akissut: Apeqquut 2a-mut akissut innersuussutigineqarpoq.

Apeqquut 3: Pineqartut ilaanni angallannikkut isumaqatigiissutit malillugit Diskoline isumaqatigiissuteqarfigineqarnikuuvuq, taakku pisussaaffeqarpat sikusimatillugu angallannikkut isumannaarinninniarnissamut?

Akissut: Ineqarnermut, Attaveqaasersuutinut Isorliunerusunullu Naalakkersuisoqarfiup apeqquutip akissuteqarfiginissaanut Disko Line oqaaseqartippaa. Disko Line imatut paasissutissiivoq:

"Aaqqiissutissanik allanik ujartuinissaq pisussaaffigaarput. Aamma taamaaliortarpugut. Ajoraluartumik attartorsinnaasat tamatigut


ajornanngiinnartanngillat – taamaattumillu suleqatitsinni pisinnaasanik atuiunnaartoqarnissaanut utaqqisariaqartarpugut. Immap sikunissaanut isumaqatigiissutit aalajangersimasut, sillimmatit, aaqqiissutaassapput akisoorujussuit, taakku piffissani atuuttuni allanngorartorujussuusarmata, aammalu ukiut tamaasa pissutsit qanoq isikkoqassanersut eqqoriarneqarsinnaaneq ajorput.”

Apeqquut 3a: Sikusimasoqartillugu qanoq sukkatigisumik angallannikkut aaqqissuussinerit aaqqissuutinneqartussaanerannik qanorlu aaqqiiniarnerup sivilisutigisussaanerannik minnerpaaffiliussaartoqarpa?

Akissut: Kiffartuussinissamut isumaqatigiissummi imm. 3.2 naapertorlugu Disko Line pisussaavoq, ilaasut ornitaannut sukkanerpaamik apuutissallugit. Tamatuma kingunerisaanik ilaasut qulimiguulimmik angallassinissamut, Disko Line-lluunniit angallassinissaanut allamut, aallartussamit kinguaattoorfiusumit sukkanerusumik ingerlanneqarsinnaasumut nuutsinneqarnissamik neqeroorfigineqartarput. Tamannali pissappat, qulimiguullit pisinnaasaat naleqquttut nuussiffiusinnaasut attartortinneqarsinnaasullu pisariaqarput.

Neriuppunga qulaani allaqqasuni apeqquteqaatitit akineqartut.

Inussiarnersumik inuulluaqqusillunga



Aqqaluaq B. Egede